

王勃集卷上

賦

春思賦

咸亨二年余春秋二十有二旅寓巴蜀浮遊
歲序殷憂明時坎壈聖代九隴縣令河東柳
大易英達君子也僕從遊焉高談胸懷頗洩
憤懣于時春也風光依然古人云風景未殊
舉目有山河之異不其悲乎僕不才耿介之
士也竊稟宇宙獨用之心受天地不平之氣



雖弱植一介窮途千里未嘗下情於公侯屈
色於流俗凜然金石自匹猶不能忘情於春
則知春之所及遠矣春之所感深矣此僕所
以撫窮賤而惜光陰懷功名而悲歲月也豈
徒幽宮狹路陌上桑間而已哉屈平有言極
千里傷春心因作春思賦庶幾乎以極春之
所至析心之去就云爾

若夫年臨九域韶光四極解宇宙之嚴氣起
亭臯之春色况風景兮同序復江山之異國

感大運之虛盈見長河之紆直蜀川風候隔
秦川今年節物異常年霜前柳葉銜霜翠雪
裏梅花犯雪妍霜前雪裏知春早看柳看梅
覺春好思萬里之佳期憶三秦之遠道淡蕩
春色悠揚懷抱野何樹而無花水何堤而無
草於是僕本浪人平生自淪懷書去洛抱劍
辭秦惜良會之邁厭他鄉之苦辛忽逢遷
候改遙憶帝鄉春帝鄉迢遞關河裏神皋欲
暮風煙起黃山半入上林園玄灞斜分曲江

水玉臺金闕紛相望千門萬戶遙相似昭陽
殿裏報春歸未央臺上看春暉水精却掛鴛
鴦慢雲母斜開翡翠幃覽道西園梅色淺爭
知比闕柳陰稀歛態調歌扇迴身正舞衣銀
蠶吐絲猶未暖金燕銜泥試學飛妾本幽閨
學歌舞寧知漢代多巡撫前年齋祭謁甘泉
今歲笙簫祠后土桃花萬騎喧長薄蘭葉千
旗照平浦見原野之芳春憶山河之遠古長
安路狹遠長安公子春來不厭看杏葉裝金

轡蒲萄縷玉鞍簷蓋臨平樂迴笳出上關上
蘭經郵杜揮鞭日將暮白馬新臨御溝道青
牛近出章臺路章臺接建章垂柳復垂楊草
開馳馬埒花滿闔雞塲南鄰少婦多妖婉北
里王孫駐行憶乍恠前春節候遲預道今年
寒食晚傷紫陌之春度惜青樓之望遠紫陌
青樓照月華珠帷黼帳七香車蛾眉畫來應
幾樣蟬鬢梳時欲斜恨雕鞍之屆晚痛銀
箭之更賒行行避葉步步看花因狂夫之蕩

子成賤妾之倡家狂夫去去無窮已賤妾春
眠春未起自有蘭閨數十重安知榆塞三千
里榆塞連延玉關側雲間沉沉不可識慈山
隱隱金河北霧裏蒼蒼幾重馳忽有驛騎出
幽并傳道春衣萬里程龍沙春草遍青海春
雪生踈勒井泉寒尚竭燕山烽火夜應明聞
道河源路遠遠誰知夫壻苦行行君行塞外
多霜露爲想春臺起煙霧遊絲空罥合歡枝
落花自遶相思樹春望年年絕幽閨離緒切

春色朝朝異邊廷羽書至都護新封萬里侯
將軍稍定三邊地長旆猶銜掃雲色寶刀尚
擁千星氣昨夜祁連驛使還征夫猶住鴈門
關君度山川成白首應知歲序歇紅顏紅顏
一別成胡越夫壻連延限城闕羌笛橫吹隴
路風戎衣直照關山月春色徒盈望春悲殊
未歇復聞天子幸關東馳道煙塵萬里紅析
羽搖初日繁笳思曉風後騎猶分長樂館前
旌已映洛陽宮洛陽宮城紛合沓珠翠中闈

盛綺羅鳳移金谷舞鶯引石城歌向夕天津
洛橋暮爭驅紫燕黃牛度閑居伊水園舊宅
邛山路武子新布金錢埒季倫欲 珊瑚樹
復道西墉春霧寡更值南津春望寫入金市
而乘羊出銅街而試馬草犯春而爭密花牽
風而亂下錦障縈山羅帷照野司空令尹之
博物二陸三張之文雅新年栢葉之樽上巳
蘭英之竿春來併是春何啻兩違秦忽逢江
外客復憶江南春羅衣乘北渚錦袖出東隣

江邊小婦無形迹特怨狂夫事行役鳳凰山
上花無數鸚鵡洲中草如積春江淡容與春
期無處所春水春魚樂春汀春鴈舉君道玉
門關何如金陵渚為問逐春人年光幾處新
何年春不至何地不宜春亦有當春逢遠客
亦有當春別故人風物雖同候悲歡各異倫
歸去春山恣閑放蕙晚蘭皋行可望何為悠
悠坐惆悵比來作客住臨邛春風春日自相
逢石鏡巖前花屢密玉輪江上葉頻濃高平

灞岸三千里少道梁山一萬重自有春花煎
別思無勞春鏡照愁容盛年耿耿辭鄉國長
路遙遙不可極形隨朗月驟東西思逐浮雲
幾南北春蝶參差命儔侶春鶯綿蠻思羽翼
余復何爲此方春長歎息會當一舉絕風塵
星軒臨上春朝昇玉署調天紀夕憇金
閨奉帝綸長卿未達終希達曲逆長貧豈刺
貧年年送春應未盡一旦逢春自有人

七夕賦

若夫乾靈鵲識之端地輔龍驂之始憑紫都
而受曆按玄丘而命紀鳳毛鍾桂閭之祥麟
角燦椒庭之祉馳朱軒於九域振黃麾於萬
里抗芝館而星羅擢蘭宮而霞起則有皇慈
霧洽聖渥天浮庭分玉禁邸瞰金樓翦鳧洲
於細柳披鶴籞於長楸啓魚鈴而分帝術授
虹壁而控神州擁黃山於石磴洩玄灞於銅
溝列瑤窓而送燠闢銀榜而迎秋君王乃排
青規搖朱鳥戒鷓與靜鸞掖統震庄而轉步

五
六
僚雲阡而縱跡嘯陳客於金牀命淮仙於桂
席翔翠於金甸迎吹簫於鳳驛佇靈匹於
星期眷神姿於月夕于時玉繩湛色金漢餘
光煙淒碧樹露濕銀塘視蓮潭之變彩見松
院之生涼引驚蟬於寶瑟宿蘭燕於瑤筐綠
壺兮千仞翫樓兮百常拂花筵而慘惻披葉
序而佯狂結遙情於漢陌飛永睇於霞莊想
佳人兮如在怨靈歡兮未揚促遙悲於四運
味遺歌於七裏於是虬簷晚靜魚扁夜飾忘

帝子之光華下君王之顏色握犀管展魚牋
顧執事招仲宣仲宣跪而稱曰臣聞九變無
律三靈有作布元氣於浩蕩運太虛於寥廓
辨河鼓於西壘降天孫於東壖循五緯而清
黃道正三衡而澄紫落海人支石之機江女
穿針之閣鄙塵情於春念擬仙契於秋諾河
光清地紀山氣斂天標霜凝碧宙水瑩丹霄
耀麟軒於霧術塞羽旆於星橋徵赤螭而架
渚漾青翰而乘潮停翠梭兮卷霜縠引鸞杼

兮割冰綃舉黃花而乘月艷寵黛葉而卷雲
翹撫今情之恨促指來渚而傷遙旣而丹軒
黃拱紫房朱籥仙御逶遲靈徒擾弱風驚雨
驟煙迴電爍媧皇名區野之龍莊叟命雕陵
之鵲駐麟駕披鸞幙奏雲和汎霞酌碧虬玉
室之饌白兔銀臺之藥荷葉頰鮫芙蓉孔雀
上元錦書傳寶字王母瓊箱薦金約綵襟魚
頭比目縱香緘燕尾同心縛羅帳五花懸珉
砌百枝然下芸幃而暱枕弛蘭服而交筵託

新歡而密勿懷徃春而潺湲於是羈鸞切鏡
放鶴驚絃悲侵玉履念起金鈿儼歸裝而容
曳整還蓋而遷延洞庭波兮秋水急關山晦
兮夕露連謂河漢之無浪似參商之永年君
王乃背彤砌陟玄室冲想自閒神情如逸痛
靈妃之稀偶喜沉思之可畢荆艷齊升燕佳
並出金聲玉貌蕙心蘭質珠櫳綺檻北風臺
繡戶雕窓南向開響曳紅雲歌面近香隨白
雪舞腰來掩清琴而獨進凌絳樹而輕迴盧

女黃金之椀張家碧玉之杯奉君王於終夕
夫何怨於良媒俄而月還西漢霞臨東沼鳧
氏鳴秋雞人唱曉玉關控鶴瓊林飛鳥君王
乃馭風殿而長懷俯雲臺而自矯矜雅範而
霜高穆冲衿而霞眇迎十客召三英香涵蕙
酌吹肅蘭旌娃館踈兮綠草積歡房寂兮紫
苔生從詞源於月徑披翰藪於雲扃方絕元
凱而高視與梁楚而駢聲

九成宮東臺山池賦

并序

九成宮東臺地接閑曠面山臨水爾其松峯
桂壑紅泉碧磴金石千聲雲霞萬色侍郎張
公雅思沉鬱永懷梓匠式侔仙造聿構靈臺
波流成止水之源拳石儼干霄之狀雖流波
覆篲俯藉人機而布葉攢花眇同天會僕因
暇日濫奉清埃敢抽南畝之才聊叙東山之
事云爾

若夫金臺妙境玉署仙居酌丹池之曉暇候
清禁之宵餘驟冲情於月道飛駿賞於煙墟

指山楹而思逸懷水鏡而神虛既而仰瞻赤
嶠傍窺黛壑復嶂煙迴攢溪霧錯偉所用之
蕪濟想神宮之可作規疊獻于盤龍憲飛泉
於掛鶴覆簣而縈巖磴浮芥而環川嶸採拳
石於溪濱蹇織珠於綺薄萍徙楚江之帶花
轉崑墟之萼岫蘊玉而虹驚浦涵珠而星落
美仁智之同歸信高深之縱託爾其扈岑漏
景曲渚留寒高松偃鶴清篠鳴鸞被蘭丘而
結佩照蓮服而披冠激坳堂於別淑引膚寸
於危巖若乃嶺橫雞秀波連鳳液花鳥縈紅
蘋魚漾碧綠衣玄袵頰鱗翠額在林數而同
歡望江湖而齊適及夫景沉西山月下東濱
峰深夜久潭靜秋新荷抽水蓋薛引山茵雪
芝獻液露菊傾津嗣南商之逸興有東海之
遐賓保休泉而肆賞混簪紱而同塵何濯纓
之有地如攀桂之無因

寒梧棲鳳賦

賦以孤鶻精夜

鳳兮鳳兮來何所圖出應明主言栖高梧梧

則嶧陽之珍木鳳則丹穴之靈雛理符有契
誰言則孤遊必有方駭南飛之驚鵲音能中
呂嗟入夜之啼鳥况其靈蕭散節物淒清
踈葉半殞高歌和鳴鳥也將託其宿止人也
焉知乎此情月照孤影風傳暮聲將振耀其
五色俟簫韶之九成九成則那率舞而下懷
彼衆會罔知淳化雖璧沼可飲更能適於醴
泉雖瓊林可棲復憶巡於竹樹念是往敢
忘晝夜何安安而能遷則思其不暇故當披

拂寒梧翻然一發自此西序言投北闕若用
之銜詔冀宣命於軒堦若使之游池庶承恩
於歲月可謂擇木而俟處卜居而後歇豈徒
比跡於四靈常棲棲而沒沒

曲江孤鳧賦

梓州之東南涪江之所合有潭焉周數十步
青壁絕地綠波澄天常有孤鳧栖蕩其側飛
沉翻暖而天性不違嗟乎宇宙之容我多矣
造化之資我厚矣何必處華池之內而求稻

梁之思哉遂作賦曰

靈鳳翔兮千仞大鵬飛兮六月雖憑力而力
舉終候時而難發不如深潭之鳥馬順歸潮
而出沒迹已存於江漢心非繫於城闕吮紅
藻翻碧蓮刷霧露棲雲煙迫之則隱馴之則
前去就無失浮沉自然爾乃忘機絕慮悵聲
弄影乘駭浪而神驚漾澄瀾而趣靜吐困雞
之戀促悲寒鴻之赴永知動息而多方屢公
洄而自省故其獨泛卑宿全真遠致反覆幽

溪留淹勝地傷雲鴈之嬰繳懼泉魚之受餌
甘辭稻梁之惠焉而全飲啄之志也

馴鳶賦

海上兮雲中青城兮絳宮金山之斷鶴玉塞
之驚鴻謂江湖之漲不足聒謂宇宙之路不
足窮終銜石矢坐傷金籠聲酸夕露影怨秋
風已矣哉何氣高而望闕卒神瘁而智廢徒
驚迹於仙遊竟纏機於俗網未若茲禽猶融
想慙丹丘之麗質謝青田之逸響與道浮

沉因時俯仰去非內懼馴非外獎夫勁鬪揮
風雄姿觸霧力制煙道神周天步鬱霄漢之
弘圖受園庭之近顧質雖滯於城闕策已成
於雲路陳平負城之居韓信昌平之寓似達
人之用晦混塵蒙而自託類君子之含道處
蓬蒿而不作悲授餌之徒懸痛開絃之自落
故爾放懷于誕暢此寄心於寥廓

遊廟山賦

并序

玄武山西有廟山東有道君廟蓋幽人之別

府也長蘿巨樹梢翳雲日王子馭風而遊冷
然而喜益懷霄漢之舉而忘城闕之戀矣因
欲攀洪崖於煙道邀羨門於天路仙師不存
壯志徒爾俄而泉石移景秋陰方積松栢群
吟悲聲四起背鄉關者無復四時之策焉嗚
乎有其志無其時則知林泉有窮路之哭煙
霞多後時之難不其悲乎遂作賦曰
陟彼山阿積石峨峨亭皋千里傷如之何啓
松崖之密蔭攀桂岳之崇柯隔浮埃於地絡

披顯氣於天羅爾其綠巖分徑蒼岑對室茵
軒丹紉芝場翠密俯泉石之清冷臨風颺之
瑟瑟仰緝臺而携手望玄都而容膝於是躡
霞岡於玉砌步雲岳於金壇懷妙童與真女
想青螭及碧鸞情恍恍而將逸心迥迥而未
安見丹房之晚晦知紫洞之宵寒既而霞昏
千嶂煙浮四野恨流俗之情多痛飛仙之術
寡驅逸思於方外踟高情於天下使蓬瀛可
得而宅焉何必懷於此都也亂曰已矣哉吾

誰欺林壑逢地煙霞失時託宇宙兮無日俟
鸞虬兮末期也鄉山水祗令人悲

澗底寒松賦 并序

歲八月壬子旅遊於蜀尋茅溪之澗深蹊絕
磴人跡罕到爰有松焉冒霜停雪蒼然百丈
雖高柯峻穎不能踰其岸嗚呼斯松託非其
所出之類器何以別乎蓋物有殊類而合情
士有因感而成興遂作賦曰

惟松之植于澗之幽盤柯跨嶮脊 憑流寓

天地兮何日凌霜露兮幾秋且時華之屢變
知俗態之多浮故其磊落殊狀森峭峻而紫
葉吟風蒼條振雪嗟英鑒之稀遇保真本之
未缺攀翠嶠而形疲指丹青而望絕已矣哉
蓋用輕則資衆器宏則施寡信棟梁之已成
非榱桷之相假徒志遠而心屈遠才高而位
下斯在物而有焉余何爲而悲者

慈竹賦

并序

廣漢山谷有竹名慈生必向內示不離本修

莖巨葉攢根沓抵叢之大者或至百千株焉
而縈結踰乎咫尺好事君子徒爲堦庭之翫
焉吁嗟非此土所有乃有厭流俗之譏動鄉
關之思者蓋撫高節而興嘆覽嘉名而思歸
遂爲賦曰

有竹猗猗生于高陂左連瑤帶右雜瓊枝恨
幽客之方賞嗟君侯之不知徒蔚丹谷遷容
綠池氣凜凜而猶在色蒼蒼而未離屈巖壑
之容貌充堦庭之羽儀爾其劃疆分域駢陰

抗趾疊幹龍迴攢根鳳峙防碧露於宵末翳
紅光於習始崇柯振而雲靄生繁葉動而風
飈起擁涼砌之晨霜屏炎扃之晝滓至若
藏載謝玄英肇切塞北河堅關南地裂觀衆
茂之咸悴驗貞輝之獨潔抽勁緘以垂霜總
嚴青而負雪蓋同類之常稟非殊方之異節
若乃宗生族茂天長地久萬抵爭盤千株竟
糾如母子之鈎帶似閨門之悌友恐孤秀而
成危每群居而自守付美名之天屬而和氣

之資受嗟乎道之存矣物亦自有不背仁以
貪地不藏節以遁時故其貞不自眩用不見
疑保夷險之無易晒榮枯之有期我蓬轉於
岷徼遂萍流於江汜分兄弟於兩鄉隔晨昏
於萬里撫真容而骨愧伏嘉號而心死庶因
感而長懷將策情而勵已

青苔賦 并序

吾之旅游數月矣憇乎荒澗覩青苔焉緣崖
而上乃喟然嘆曰嗟乎苔之生於林塘也為

幽客之賞苔之生於軒庭也為居人之怨斯
擇地而處無累於物也愛憎從而生遂作賦
曰

若夫桂洲蒼澗松崖祕液繞江曲之寒沙抱
巖幽之古石汎迴塘而積翠縈修樹而凝碧
契山客之竒情諧野人之妙適及其瑤房有
寂瓊室無光菲微君子之砌蔓延君侯之堂
引浮青而泛露散輕綠而承霜起金鈿之舊
感驚玉筍之新行若夫弱質綿纖滋布獲

形不用之境託跡無人之路望夷險而齊
歸在高深而委遇惟愛憎之未染何悲歡之
詭赴宜其背陽就陰違喧處靜不根不蒂無
華無影耻桃李之暫芳笑蘭桂之不末故順
時而不競每乘幽而自整

採蓮賦 并序

昔之賦芙蓉者多矣雖復曹王潘陸之逸曲
孫鮑江蕭之妙韻莫不權陳麗美粗舉採掇
豈所謂究厥麗態窮其風謚哉頃乘暇景歷

觀衆製伏翫累日有不滿焉遂作賦曰
非登高可以賦者唯採蓮而已矣况洞庭兮
紫波復瀟湘兮綠水或暑雨兮朝霽乍涼風
兮暮起黛葉青跼煙周五湖紅葩絳蘓雷鏢
千里尤見重於幽客信作謠於君子爾其珍
族廣茂淑類博傳 河渭之空曲被沮漳之
漪連燭澄灣而爛爛亘修漲之田田豈直水
區澤國江濬海堦是以吳娃春妍感靈翹於
上節悅瑞色於中年錦帆映浦羅衣塞川飛

木蘭之畫楫駕芙蓉之綺船問子何去幽潭
採蓮已矣哉誠不知其所以然賞由物名興
以情遷故其遊泳一致悲欣萬緒至若金室
麗妃璇宮佚女傷鳳臺之寂寞厭鸞扇之閑
虛待飲南津陪歡北渚見磯岸之紆直靚旌
旄之低舉上苑神池芳林御陂樓陰架泚殿
彩乘漪張拜洛之容衛備橫汾之羽儀簫鼓
發兮龍文動鱗羽喧兮鷓首移咸靚粧而麗
服各分驚而並馳蘋藻礙荇觸船危視雲

霞之沃蕩望沐泉之蔽野川泱泱兮菡萏積
水湛湛兮芙蓉披惜歲時兮易暮傷君王兮
未知折紕房與綳葍攬紅葩及碧枝迴綃裙
兮竊獨歎步羅襪兮私自奇莫不驚香悼色
畏別傷離復有渚官年少期門公子翠髮蛾
眉頰唇皓齒傅粉蘭臺之上偷香椒房之裏
亦復銜恩激誓佩籠絨愁承好賜之珍席奉
嬉宴之彩旂繡棟曛兮翠羽帳瑤塘曙兮青
翰舟攀條拾葢浸波所流池心寬而藻薄浦

口窄而萍稠和橈姬之衛吹接榜女之齊謳
去復去兮水色夕採復採兮荷葉秋願承歡
而卒歲長接席而寡仇于持薊北無事關西
始樂霧靜江垠氛恬海漠寢恠氣於沅湘照
榮光於河洛殊方異類舞詠相錯王公卿士
歌吹並作則有侯家瑣第戚里方園穿池灞
岸之曲蓄水河陽之源隄防谷口島嶼輾轅
嘉木畢植靈草具繁沉桂北之丹藕擢荆南
之紫根鬱萋萋而霧合粲曄曄而霞翻泊于

氣徹都鄙景萃川陸麥雨微涼梅風淺燠命
妖侶於石城嘯娛朋於金谷乃使綠珠橫棹
青琴理舳樽芳醪籍珍餽汎玉潭之瀟漫遊
金渠之隈隩石近水而苔濃岸連山而樹複
排芰末而爭遠託蘆間而競逐赴汨凌波飛
桂振蘿風低綠幹水濺黃螺上客喧兮樂未
已美人醉兮顏將酡畏蓮色之如臉願衣香
而勝荷徘徊郢調悽愴燕歌念窮歡於水淡
誓畢賞於川阿結漢女邀湘娥北溪藥尚密

南汀花更多恨光景兮不住諧芳馨兮謂何
若乃南鄢義妻東吳信婦結襦整佩承筐奉
箒忽君子兮有行復良人兮遠征南討九真
百越北戍鷄田鴈城念去魂駭相視骨驚臨
春渚兮一送見秋潭之四平與之子別煙波
望絕念子之寒江山路難水淡淡兮蓮葉紫
風颯颯兮荷花丹剪瑤帶而猶恨折瓊英而
不歡既而緣隈逗浦返拽歸櫓睇芳草兮已
殘憶離居兮方苦延素頸於極攘皓腕於

許惜佳期兮未由徒增思兮何補又若倡
姬蕩媵命侶招群淇上洛表湘臯汝濱望洲
草兮翡翠色動浦水兮驪龍文願解佩以邀
子思褰裳而從君悲時暮愁日曛鳴埭釧兮
響窈窕艷珠翠兮光繽紛憐曙野之絳氣愛
晴天之碧雲棹巡汀而柳拂船向渚而菱分
掇翠莖以翳景龍朱萼以爲裙艇檝凌亂雲
流雨散鳴榔絡驛霧籠煙穉狀飛虬之蜿蜒
若驚鴻之奕奕艇怯奔潮篙憎淺石絲着手

而偏統刺牽衣而屢褰迺有貴子王孫乘閒
縱觀何平叔之符彩潘安仁之藻翰稅龍馬
於金堤命舟於石岸錦纜翻灑銀櫓照爛
日側光深浪驚風沉眇北渚之新贈恣東溪
之密尋鴛鴦繡彩之文履玳瑁瓊華之寶琴
扣舷擊榜吳歛越吟溱與洧兮葉覆水淮與
濟兮花冒濤值明月之夕出逢丹霞之夜臨
茱萸歌兮軫妾思兮藥曲兮傷人心伊採蓮
之賤事信忘情之益寡雖兆迹於水鄉遂風

行於天下感極哀樂聲參鄭雅是以緬察谷
底窮覽地維北盡豐鎬滂瀆南究江沱越沂
莫不俟期應節沿濤汎湄薄言採之與言服
之發文扁之嚴什動幽悞之情詩使人結眷
令人想思宜其色震百草香奪九芝極飄羽
之神雀負青之寶龜紫秩流記丹經祕詞
豈徒加繡柱之光彩曄文井之華滋已矣哉
向使時無其族代之厥類獨秀上清之境不
生中國之地學鸞鳳而時來與鸚鵡而間至

必能使象瑞彩沒群賦色沮湯武齋戒伊臬
延佇豈俾夫秦童趙僕倡姬艷女狎而翫之
擷而採之乎時有東鄙幽人西園舊客常陪
帝子之輿經在天人之籍詠綠竹於風暎賦
朱華於月夕暑往寒來忽矣悠哉蓬飄使逝
天涯海際似還邛之寥廓同適越之滄滯蕭
索窮途飄颻一隅昔聞七澤今遇五湖聽菱
歌兮幾曲視蓮芳兮幾株非鄴地之宴語異
睢之歡娛况復殊方別域重瀛復嶂虞翻

則故鄉寥落許靖則生涯惆悵感芳草之及
時懼脩名之或喪誓將刻跡穎上極影渭陽
枕箕岫之孤石泥磻溪之小塘食素食兮吸
絳芳荷爲衣兮芟爲裳永絜已於丘壑長奇
心於君王且爲歌曰芳華懼功名 奇秀兮
異植紅光兮碧色稟天地之淑麗承雨露之
華飾蓮有藕兮藕有枝才有用兮用有時何
當婀娜花實移爲君含香藻鳳池

王勃集卷上

王勃集卷下

四言古詩

倬彼我系

勃兄勵序

倬彼我系舍弟號州叅軍勃所作也傷迫乎
家貧道未成而受祿不得如古之君子四十
強而仕也故本其情性原其事業因陳先人
之迹以議出處致天爵之艱難也

倬彼我系出自有周分疆錫社派別枝流居
衛仕宋臣羸相劉廼武廼文或公或侯晉曆

則故鄉寥落許靖則生涯惆悵感芳草之及
時懼脩名之或喪誓將刻跡穎上極影渭陽
枕箕岫之孤石汎磻溪之小塘食素食兮吸
絳芳荷爲衣兮芟爲裳永絜已於丘壑長奇
心於君王且爲歌曰芳華懼功名 奇秀兮
異植紅光兮碧色稟天地之淑麗承雨露之
華飾蓮有藕兮藕有枝才有用兮用有時何
當婀娜花實移爲君含香藻鳳池

王勃集卷上

王勃集卷下

四言古詩

倬彼我系

勃兄勵序

倬彼我系舍弟號州叅軍勃所作也傷迫乎
家貧道未成而受祿不得如古之君子四十
強而仕也故本其情性原其事業因陳先人
之迹以議出處致天爵之艱難也

倬彼我系出自有周分疆錫社派別枝流居
衛仕宋臣羸相劉廼武廼文或公或侯晉曆

崩折衣冠擾弊粵自太原播祖江漢禮喪
隱時屯道閉王室如墜生人多瘡伊我有器
思逢其主自東旋西擇木開宇田彼河曲家
乎汾浦天未厭亂吾將誰輔伊我祖德思齊
九疋不常厥所于茲五遷欲及時也夫豈願
焉其位雖屈其言則傳爰述帝制大蒐王道
曰天曰人是祖是考禮樂咸若詩書具草賸
厥孫謀永為家寶伊余小子信慙明哲彼網
有條彼車有轍田屏人事克終前烈干嗟代

網卒余來綫來綫伊何謂余曰仕我瞻先達
三十方起夫豈不懷高山仰止願言錡德啜
菽飲水有烏反哺其聲嗷嗷言念舊德憂心
忉忉今我不養歲月其滔僂俛從役豈敢告
勞從役伊何薄求卑位告勞伊何來叅卿事
名存實爽負信愆義靜言遐思中心是愧

五言古詩

上巳浮江宴

披觀玉京路駐賞金臺陟逸興懷九仙良辰

傾四美松吟白雲際桂馥青溪裏別有江海
心日暮情何已

春日宴樂遊園賦韻得接字

帝里寒光盡神皋春望淡梅郊落晚英柳甸
驚初葉流水抽竒弄崩雲灑芳牒清樽湛不
空暫喜平生接

山亭夜宴

桂宇幽襟積山亭涼夜永森沉野徑寒蕭穆
巖扉靜竹晦南河色荷翻北潭景清興殊未

歸林端照初景

詠風

肅肅涼景生加我林壑清驅煙尋磻戶卷霧
出山楹去來固無跡動息如有情日落山水
靜爲君起松聲

懷仙 并序

客有自幽山來者起予以林壑之事而煙霞
在焉思解纓紱未詠山水神與道超跡爲形
滯故書其事焉

鶴岑有竒徑鱗洲富仙家紫泉漱珠液玄巖
列丹葩常希披塵網眇然登雲車鸞情極霄
漢鳳想疲煙霞道存蓬瀛近意愜朝市賒無
為坐惆悵虛此江上華

忽夢遊仙

僕本江上客牽跡在方內寐寤霄漢間居然
有靈對翕爾登霞首依然躡雲背電策驅龍
光煙途儼鸞態乘月披金帔連星解瓊珮浮
識俄易歸真魂莫難再寥廓沉遐想周遑奉
遺誨流俗非我鄉何當釋塵昧

田家三首

阮籍生年懶嵇康意氣踈相逢一飽醉獨坐
數行書生池聊養鶴閒田且牧猪草生元亮
徑花暗子雲居倚牀看婦織登壠課兒鋤迴
頭尋仙子併是一空虛

家住箕山下門枕潁川濱不知今有漢惟言
昔避秦琴伴庭前月酒勸後園春自得中林
士何忝上皇人

平生唯以樂作性不能無朝朝訪鄉里夜夜遣人酤家貧留客久不暇道精麈抽簾特益炬拔篲更燃爐怕聞飲不足何見有殘壺

六言古詩

雜曲

智瓊神女來訪文君蛾眉始約羅裙初薰歌齊曲韻舞亂行分若向陽臺薦枕何嘗得勝朝雲

七言古詩

秋夜長

秋夜長殊未央月明白露澄清光層城綺閣遙相望川無梁北風受節南鴈翔崇蘭委質時菊芳鳴環曳履出長廊為君秋夜擣衣裳織羅對鳳凰丹綺雙鴛鴦調砧亂杵思自傷征夫萬里戍他鄉鶴關音信斷龍門道路長君在天一方寒衣徒自香

採蓮曲

採蓮歸綠水芙蓉衣秋風起浪鳧鴈飛桂棹

蘭橈下長浦羅裙玉腕輕搖櫓葉嶼花潭極
望平江謳越吹相思苦相思苦佳期不可駐
塞外征夫猶未還江南採蓮今已暮採蓮花
渠今那必盡娼家官道城南把桑葉何如江
上採蓮花蓮花復蓮花花葉何稠疊葉翠本
羞眉花紅強如頰佳人不在茲悵望別離時
牽花憐共蒂折藕愛連絲故情無處所新物
從華滋不惜匹津交佩解還羞北海鴈書遲
採蓮歌有節採蓮夜未歇正逢浩蕩江上風

又值徘徊江上月徘徊蓮浦夜相逢吳姬越
女何丰茸共問寒江千里外征客關山路幾
重

臨高臺

臨高臺臨高臺迢迢絕浮埃瑤軒綺構何崔嵬
鬼鸞歌鳳吹清且哀俯瞰長安道萋萋御溝
草斜對甘泉路蒼蒼茂陵樹高臺四望同佳
氣鬱恣恣紫閣丹樓紛照耀壁房錦殿相玲
瓏東迷長樂觀西指未央宮赤城映朝日綠

樹搖春風旗亭百隊開新市甲第千毫分戚
里朱輪翠蓋不勝春疊榭層楹相對起復有
青樓大道中繡戶文窓雕綺櫳錦衣畫不裝
羅帷夕夫空歌綺朝揜翠粧鏡晚窺紅燕君
安寶髻蛾眉罷花叢塵間狹路黯將暮雲間
月色明如素鴛鴦池上兩兩飛鳳樓下雙
雙度物色正如此佳期那不願銀鞍繡轂盛
繁華可憐今夜宿娼家娼家少婦不須盤東
園桃李片時春君看舊日高臺處栢梁銅雀

生黃塵

滕王閣

滕王高閣臨江渚珮玉鳴鑾罷歌舞畫棟朝
飛南浦雲朱簾暮捲西山雨閑雲潭影日悠
悠物換星移度幾秋閣中帝子今何在檻外
長江空自流

江南弄

江南弄巫山連楚夢行雲幾相送瑤軒金谷
上春時玉童仙女無見期紫露香煙眇難託

清風明月遙相思
相思草徒綠為聽雙飛鳳
凰曲

五言律詩

聖泉宴

披襟乘石磴
列籍俯春泉
闌氣熏山酌
松聲韻野絃
影飄垂葉外
香度落花前
興洽林塘晚
重巖起夕煙

尋道觀

披瀝光分野
蓬闕盛規模
碧壇清桂闕
丹洞

蕭松樞玉笈
三山記金箱
五嶽圖蒼虬
不可得空望
白雲衢

散關晨度

關山凌旦開
石路無塵埃
白馬高譚去
青牛真氣來
重門臨巨壑
連棟起崇隈
即今揚策度
非是棄繻回

別薛華

送送多窮路
遑遑獨問津
悲涼千里道
恸斷百年身
心事同漂泊
生涯共苦辛
無論去與

住俱是夢中人

重別薛華

明月沉珠浦秋風濯錦川樓臺臨絕岸洲渚
亘長天旅泊成千里棲遑共百年窮途唯有
淚還望獨潛然

遊梵宇三學寺

杏閣披青磴瑤臺控紫岑葉齊山路狹花積
野壇深蘿幌杻禪影松門聽梵音遽忻陪妙
躅延賞滌煩襟

麻平晚行

百年懷土望千里倦遊情高低尋戍道遠近
聽泉聲磗葉纔分色山花不辨名羈心何處
盡風急暮猿清

送盧主簿

窮途非所恨虛室自相依城闕居年滿琴尊
俗事稀開襟方未已分袂忽多違東巖富松
竹歲暮幸同歸

餞韋兵曹

征驂臨野吹別袂慘江垂川霽浮煙斂山明
落照移鷹風凋晚葉蟬露泣秋枝亭皋分遠
望延想間雲涯

白下驛餞唐少府

下驛窮交日昌亭旅食年相知何用早懷抱
即依然浦樓低晚照鄉路隔風煙去去如何
道長安在日邊

送杜少府之任蜀州

城關輔三秦風煙望五津與君離別意同是

宦游人海内存知己天涯若比隣無爲在岐
路兒女共霑巾

仲春郊外

東園垂柳徑西堰落花津物色連三月風光
絕四隣鳥飛村覺暖魚戲水知春初晴山院
裏何處染鶯塵

郊興

空園歌獨酌春日賦閒居澤蘭侵小徑河柳
覆長渠雨去花光濕風歸葉影疎山人不惜

醉唯畏綠尊虛

郊園即事

煙霞春早賞松竹故年心
斷山疑畫障縣溜瀉鳴琴
草徧南亭合花開北院深
閑居饒酒賦隨興欲抽簪

觀佛跡寺

蓮座神容儼松崖聖跡餘
年長金淺地久石文踈
顏華臨曲磴傾影赴前除
共嗟陵谷遠俄視化城虛

山居晚眺贈王道士

金壇踈俗宇玉洞似仙群
花枝棲晚露峰葉度晴雲
斜照移山影迴沙擁籀文
琴尊方待興竹樹已迎曛

八僊徑

柰園欣八正松巖訪九仙
援蘿窺霧術攀桂俯雲煙
代北鸞膠至遼西鶴騎旋
終希脫塵網連翼下芝田

春日還郊

閑情蕪哩嘿，攜杖赴巖泉。草綠繁新帶，榆青
綴古錢。魚牀侵岸水，鳥路入山煙。還題千子
賦，花樹滿春田。

對酒

投簪下山閣，携酒對河梁。狹水牽長鏡，高花
送斷香。繁鴛歌似曲，踈蝶舞成行。自然惟一
醉，非但閑年光。

觀內懷仙

玉架殘書隱金壇，舊迹迷牽花。尋紫澗步葉

下清溪，瓊漿猶類乳。石髓尚如泥，自能成羽
翼。何必仰雲梯。

秋日別王長史

別路餘千里，深恩重百年。正悲西候日，更動
北梁篇。野色籠寒霧，山光斂暮煙。終知難再
奉，懷德自潛然。

上巳浮江宴韻得遙字

上巳年光促，中川興緒遙。綠齊山葉滿，紅淺
花銷泉聲喧。後澗虹影照，前橋蘧悲春望。

遠江路積波潮

長柳

晨征犯煙磴夕憇在雲關晚風清近壑新月
照澄灣郊童樵唱返津吏釣歌還客行無與
晤賴此釋愁顏

銅雀妓二首

金鳳鄰銅雀漳河望鄴城君王無處所臺榭
若平生舞席紛何就歌梁儼未傾西陵松檟
冷誰見綺羅情

妾本深宮妓層城閉九重君王歡愛盡歌舞
為誰容錦衾不復襲羅衣誰再縫高臺西北
望流涕向青松

羈遊餞別

客心懸隴路遊子倦江干槿豐朝砌靜篠密
夜窓寒琴聲銷別恨風景駐離歡寧竟山川
遠悠悠旅思難

易陽早發

飭裝侵曉月奔策候殘星危閣尋丹嶂回梁

屬翠屏雲間迷樹影霧裏失峯形復此涼颺
至空山飛夜螢

焦岸早行和陸四

侵星違旅館乘月戒征儔復嶂迷晴色虛巖
辨暗流猿吟山漏曉螢散野風秋故人渺何
際鄉關雲霧浮

深灣夜宿

津塗臨巨壑村宇架危岑堰絕灘聲隱峯交
樹影深江童暮理揖山女夜調砧此時故鄉

遠寧知遊子心

傷裴錄事喪子

蘭塔霜候早松露空臺深魄散珠胎沒芳銷
玉樹沉露文晞宿草煙照慘平林芝焚空歎
息流恨滿簾金

五言排律

泥谿

弭棹凌奔壑低鞭躡峻岐江濤出岍險峰磴
入雲危溜急船文亂巖斜騎影移水煙籠翠

渚山照落丹崖風生蘋浦葉露泣竹潭枝泛
水雖云美勞歌誰復知

三月曲水宴

彭澤官初去河陽賦始傳田園歸舊國詩酒
間長筵列室窺丹洞分樓瞰紫煙縈迴亘津
渡出沒控郊壓鳳琴調上客龍轡儼群仙松
石偏宜古藤蘿不記年重簷交密樹複磴擁
危泉抗石晞南嶺乘沙眇北川傳巖來築處
磻谿入釣前日斜真趣遠幽楚思涼蟬

秋日仙遊觀贈道士

石圖分帝宇銀牒洞靈宮迴丹紫岫室復翠
上巖攏霧濃金竈靜雲暗玉壇空野花常捧
露山葉自吟風林泉明月在詩酒故人同待
余逢石髓從爾命飛鴻

五言絕句

晚留鳳州

寶雞辭舊役仙鳳歷遺墟去此近城闕青山
明月初

羈春

客心千里倦春事一朝歸還傷北園裏重見
落花飛

林塘懷友

芳屏畫春草仙杼織朝霞何如山水路面對
即飛花

山扉夜坐

抱琴開野室攜酒對情人林塘花月下別似
一家春

春莊

山春蘭葉徑城外李桃園豈知人事靜不覺
鳥聲喧

春遊

客念紛無極春淚倍成行今朝花樹下不覺
戀年光

春園

山泉兩處晚花柳一園春還持千日醉共作
百年人

林泉獨飲

丘壑經塗賞花柳遇時春相逢今不醉物色
自輕人

登城春望

物外山川近晴初景霽新芳郊花柳遍回處
不宜春

他鄉叙興

綴葉歸煙晚乘花落照春邊城琴酒處俱是
越鄉人

夜興

野煙含夕渚山月照秋林還將中散興來偶
步兵琴

臨江二首

泛汎東流水飛飛北上塵歸驂將別棹俱是
倦遊人
去驂嘶別路歸棹隱寒洲江皋木葉下應想
故城秋

江亭夜月送別二首

江送巴南水山橫塞北雲津亭秋月夜誰見
泣離群
亂煙籠碧砌飛月向南端寂寂離亭掩江山
此夜寒

別人四首

久客逢餘閨他鄉別故人自然堪下淚誰忍
望征塵
江上風煙積山幽雲霧多送君南浦外還望
將如何

桂軺雖不駐蘭筵幸未開林塘風月賞應待
故人来

霽華淨天末霧色籠江際客子常畏人何爲
久留滯

贈李十四四首

野客思茅宇山人愛竹林琴尊唯待處風月
自相尋

小徑徧宜草空庭不厭花平生誰與酒自得
會仙家

亂竹開三徑
飛花滿四鄰
從來揚子宅
別有尚玄人

風筵調桂軫
月徑引藤杯
直當花院裏
書齋望曉開

早春野望

江曠春潮白
山長曉岫青
他鄉臨睨極
花柳映邊亭

山中

長江悲已滯
萬里念將歸
况屬高風晚
山山

黃葉飛

冬郊行望

桂密巖花白
梨疎林葉紅
江皋寒望盡
歸念斷征蓬

寒夜思友三首

久別侵懷抱
他鄉變容色
月下調鳴琴
相思此何極

雲間征思斷
月下歸愁切
鴻鴈西南飛
如何故人別

朝朝翠山下夜夜蒼江曲復此 相思清樽
湛芳綠

始平晚息

觀闕長安近江山蜀路賒客行朝復夕無處
是鄉家

扶風晝局離京浸遠

帝里金莖去扶風石柱來山川殊未已行路
方悠哉

普安建陰題壁

江漢深無極梁岷不可攀山川雲霧裏遊子
幾時還

九日

九日重陽節開門有菊花不知來送酒若箇
是陶家

七言絕句

秋江送別二首

早是他鄉值早秋江亭明月帶江流已覺逝
川傷別念復看津樹隱離舟

歸舟歸騎儼成行
江南江北互相望
誰謂波瀾纔一水
已覺山川是兩鄉

蜀中九日

九月九日望鄉臺
他席他鄉送客杯
人情已厭南中苦
鴻鴈那從北地來

寒夜懷友雜體二首

北山煙霧始茫茫
南津霜月正蒼蒼
秋深客思紛無已
復值征鴻中夜起
複閣重樓向浦開
秋風明月度江來
故人故

情懷故宴相望
相思不相見

王勃集卷下終